

四庫全書

史部

欽定四庫全書

史部

明史卷一百十

三至五

御史臣李陽祜覆勘

總校官編修臣朱鈐

欽定四庫全書

明史卷一百十三

大學士張廷玉等奉 勅修

列傳第十

后妃

明太祖鑒前代女禍立綱陳絕首嚴內教洪武元年命

儒臣修女誡諭翰林學士朱升曰治天下者正家為先

正家之道始於謹夫婦后妃雖母儀天下然不可俾預

政事至於嬪嬙之屬不過備職事侍巾櫛恩寵或過則驕恣犯分上下失序歷代宮闈政由內出鮮不為禍惟明主能察於未然下此多為所惑卿等其纂女誠及古賢妃事可為法者使後世子孫知所持守升等乃編錄上之五年六月命禮臣議宮官女職之制禮臣上言周制後宮設內官以贊內治漢室內官一十四等凡數百人唐設六局二十四司官凡一百九十人女史五十餘人皆選良家女充之帝以所設過多命重加裁定於是

折衷曩制立六局一司局曰尚宮尚儀尚服尚食尚寢  
尚功司曰宮正秩皆正六品每局領四司其屬二十有  
四而尚宮總行六局之事戒令責罰則宮正掌之官七  
十五人女史十八人視唐減百四十餘人凡以服勞宮  
寢祇勤典守而已諸妃位號亦惟取賢淑莊敬惠順康  
寧為稱閨房雍肅旨寓深遠又命工部制紅牌鐫戒諭  
后妃之詞懸於宮中牌用鐵字飾以金復著令典自后  
妃以下至嬪御女史巨細衣食之費金銀幣帛器用百

物之供皆自尚宮取旨牒內使監覆奏移部臣取給焉  
若尚宮不及奏內史監不覆奏而輒領於部者論死或  
以私書出外罪亦如之宮嬪以下有疾醫者不得入宮  
以證取藥何其慎也是以終明之代宮壺肅清論者謂  
其家法之善超軼漢唐爰自孝慈以迄愍后考厥族里  
次其世代雖所遇不齊顯晦異致而凡舉正號者並列  
於篇其妃嬪有事實者亦附見焉

后妃一

太祖孝祠高皇后

孫貴妃

李淑妃

郭寧妃

惠帝馬皇后

成祖仁孝徐皇后

王貴妃

權賢妃

仁宗誠孝張皇后

宣宗恭讓胡皇后

孝宗孫皇后

吳賢妃

郭嬪

英宗孝莊錢皇后

孝肅周太后

景帝汪廢后

肅孝杭皇后

憲宗吳廢后

孝貞王皇后

孝穆紀太后

孝惠邵太后

萬貴妃

太祖孝慈高皇后馬氏宿州人父馬公母鄭媼早卒馬公素善郭子興遂以后託子興馬公卒子興育之如己女子興哥太祖以后歸馬后仁慈有智鑒好書史太祖



有劄記輒命后掌之倉卒未嘗忘子興嘗信讒疑太祖  
后善事其妻嫌隙得釋太祖既克太平后率將士妻妾  
渡江及居江寧吳漢接境戰無虛日親緝甲士衣鞋佐  
軍陳友諒寇龍灣太祖率師禦之后盡發宮中金帛犒  
士嘗語太祖定天下以不殺人為本太祖善之洪武元  
年正月太祖即帝位冊為皇后初后從帝軍中值歲大  
歉帝又為郭氏所疑嘗乏食后竊炊餅懷以進肉為焦  
居常貯糗糒脯修供帝無所乏絕而已不宿飽及貴帝

比之蕪羹豆粥滹沱麥飯每對羣臣述后賢同於唐長  
孫皇后退以語后后曰妾聞夫婦相保易羣臣相保難  
陛下不忘妾同貧賤願無忘羣臣同患難且妾何敢比  
長孫皇后也后勤於內治暇則講求古訓告六宮以宋  
多賢后命女史錄其家法朝多省覽或言宋過仁厚后  
曰過仁厚不愈於刻薄乎一日問女史黃老何教也而  
竇太后好之女史曰清淨無為為本若絕仁棄義民復  
孝慈是其教矣后曰孝慈即仁義也詎有絕仁義而為

孝慈者哉后嘗誦小學求帝表章焉帝前殿決事或震怒后伺帝還宮輒隨事微諫雖帝性嚴然為緩刑戮者數矣參軍郭景祥守和州人言其子持稍欲殺父帝將誅之后曰景祥止一子人言或不實殺之恐絕其後帝庶之果枉李文忠守嚴州楊憲誣其不法帝欲召還后曰嚴敵境也輕易將不宜且文忠素賢憲言詎可信帝遂已文忠後卒有功學士宋濂坐孫慎罪逮至論死后諫曰民家為子弟延師尚以禮全終始況天子乎且濂

家居不知情帝不聽會後侍帝食不御酒食肉帝問故對曰妾為宋先生作福事也帝惻然投箸起明日赦瀛安置茂州吳興富民沈秀者助築都城三之一又請犒軍帝怒曰匹夫犒天子軍亂民也宜誅后諫曰妾聞法者誅不法也非以誅不祥民富敵國民自不祥不祥之民天將災之陛下何誅焉乃釋秀戍雲南帝嘗令重囚築城后曰贖罪罰役國家至恩但疲囚加役怨仍不免死亡帝乃悉赦之帝嘗怒責宮人后亦佯怒令執付宮

正司議罪帝曰何為后曰帝王不以喜怒加刑賞當陛下怒時恐有畸重付宮正即酌其平矣即陛下論人罪亦詔有司耳一日問帝今天下民安乎帝曰此非爾所宜問也后曰陛下天下父妾辱天下母子之安否何可不問遇歲旱輒率宮人蔬食助祈禱歲凶則設麥飯野菜帝或告以振卹后曰振卹不如蓄積之先備也奏事官朝散會食廷中后命中官取飲食親嘗之味勿甘遂啓帝曰人主自奉欲薄養賢宜厚帝為飭光祿官帝幸

太學還后問生徒幾何帝曰數千后曰人才衆矣諸生有廩食妻子將何所仰給於是立紅板倉積糧賜其家太學生家糧自后始諸將克元都得寶玉至后曰元有是而不能守意者帝王自有寶歟帝曰朕知后謂得賢為寶耳后拜謝曰誠如陛下言妾與陛下起貧賤至今日恒恐驕縱生於奢侈危亡起於細微故願得賢人共理天下又曰法屢更必弊法弊則奸生民數擾必困民困則亂生帝嘆曰至言也命女史書之冊其規正類如

此帝每御膳后皆躬自省視平居服大練浣濯之衣雖  
敝不忍易聞元世祖后者故弓弦事亦命取練織為衾  
裯以賜高年笄獨餘帛類絲緝成衣裳賜諸王妃公主  
使知蠶桑艱難妃嬪宮人被寵有子者厚待之命婦入  
朝待之如家人禮帝欲訪后族人官之后謝曰爵祿私  
外家非法力辭而止然言及父母早卒輒悲哀流涕帝  
封馬公徐王鄭媼為王夫人修墓置廟焉洪武十五年  
八月寢疾羣臣請禱祀求良醫后謂帝曰死生命也禱

祀何益且醫何能活人使服藥不效得毋以妾故而罪  
諸醫乎疾亟帝問所欲言曰願陛下求賢納諫慎終如  
始子孫皆賢臣民得所而已是月丙戌崩年五十一帝  
慟哭遂不復立后是年九月庚午葬孝陵謚曰孝慈皇  
后宮人思之作歌曰我后聖慈化行家邦撫我育我懷  
德難忘懷德難忘於萬斯年罔彼下泉悠悠蒼天永樂  
元年上尊謚曰孝慈昭憲至仁文德承天順聖高皇后  
嘉靖十七年加上尊謚曰孝慈貞化哲順仁徽成天育



聖至德高皇后

成穆貴妃孫氏陳州人元末兵亂妃父母俱亡從仲兄  
蕃避兵揚州青軍陷城元帥馬世熊得之育為義女年  
十八太祖納焉及即位冊封貴妃位衆妃上洪武七年  
九月薨年三十有二帝以妃無子命周王肅行慈母服  
三年東宮諸王皆期勅儒臣作孝慈錄庶子為生母服  
三年衆子為庶母期自妃始葬褚岡賜兄瑛田租三百  
石歲供祀後附墓孝陵

淑妃李氏壽州人父傑洪武初以廣武衛指揮北征卒於陣十七年九月孝慈皇后服除冊封淑妃攝六宮事未幾薨

寧妃郭氏濠州人郭山甫女山甫善相人太祖時過其家山甫相之大驚曰公相貴不可言因謂諸子興英曰吾相汝曹皆可封侯者以此亟遣從渡江並遣妃侍太祖後封寧妃李淑妃薨妃攝六宮事山甫累贈營國公興英皆以功封侯自有傳

惠帝皇后馬氏光祿少卿全女也洪武二十八年冊為  
皇太孫妃建文元年二月冊為皇后四年六月城陷崩  
於火

成祖仁孝皇后徐氏中山王達長女也幼貞靜好讀書  
稱女諸生太祖聞后賢淑召達謂曰朕與卿布衣交也  
古君臣相契者率為婚姻卿有令女其以朕子棣配焉  
達頓首謝洪武九年冊為燕王妃高皇后深愛之從王  
之藩居孝慈高皇后喪三年蔬食如禮高皇后遺言可

誦者后一一舉之不遺靖難兵起王襲大寧李景龍乘間進圍北平時仁宗以世子居守凡部分備禦各稟命於后景隆攻城急城中兵少后激勸將校士民妻皆授甲登陴拒守城卒以全王即帝位冊為皇后言南北每年戰鬪兵民疲敝宜與休息又言當世賢才皆高皇帝所遺陛下不宜以新舊間又言帝堯施仁自親始帝輒嘉納焉初后弟增壽常以國情輸之燕為惠帝所誅至是欲贈爵后力言不可帝不聽竟封定國公命其子景

昌襲乃以告后后曰非妾志也終弗謝嘗言漢趙二王性不順官僚宜擇廷臣兼署之一日問陛下誰與圖治者帝曰六卿理政務翰林職論思后因請悉召見其命婦賜冠服鈔幣諭曰婦之事夫奚止饋食衣服而已必有助焉朋友之言有從有違夫婦之言婉順易入吾旦夕侍上惟以生民為念汝曹勉之嘗採女憲女誠作內訓二十篇又類編古人嘉言善行作勸善書頒行天下永樂五年七月疾革惟勸帝愛惜百姓廣求賢才恩禮

宗室無驕畜外家又告皇太子曩者北平將校妻為我  
荷戈城守恨未獲隨皇帝北巡一賚卹之也是月乙卯  
崩年四十有六帝悲慟為薦大齋於靈谷天禧二寺聽  
羣臣致祭光祿為具物甲午謚曰仁孝皇后七年營壽  
陵於昌平之天壽山又四年而陵成以后葬焉即長陵  
也帝亦不復立后仁宗即位上尊謚曰仁孝慈懿誠明  
莊獻配天齋聖文皇后祔太廟

昭獻貴妃王氏蘇州人永樂七年封貴妃妃有賢德事

仁孝皇后恭謹為帝所重帝晚年多急怒妃曲為調護  
自太子諸王公主以下皆倚賴焉十八年七月薨禮視  
太祖成穆孫貴妃

恭獻賢妃權氏朝鮮人永樂時朝鮮貢女充掖庭妃與  
馬姿質穠粹善吹玉簫帝愛憐之七年封賢妃命其父  
永均為光祿卿明年十月侍帝北征凱還薨於臨城葬  
嶧縣

仁宗誠孝皇后張氏永城人父麒以女貴追封彭城伯

具外戚傳洪武十六年封燕世子妃永樂二年封皇太子妃仁宗立冊為皇后宣宗即位尊為皇太后英宗即位尊為太皇太后后始為太子妃操婦道至謹雅得成祖及仁孝皇后懽太子數為漢趙二王所間體肥碩不能騎射成祖恚至減太子宮膳瀕易者屢矣卒以后故得不廢及立為后中外政事莫不周知宣德初軍國大議多稟聽裁決是時海內寧泰帝入奉起居出奉遊宴四方貢獻雖微物必先上皇太后兩宮慈孝聞天下三



年太后遊西苑皇后皇妃侍帝親掖輿登萬歲山奉觴  
上壽獻詩頌德又明年謁長獻二陵帝親橐鞬騎導至  
河橋下馬扶輦畿民夾道拜觀陵旁老穉皆山呼拜迎  
太后頷曰百姓戴君以能安之耳皇帝宜重念及還過  
農家召老婦問生業賜鈔幣有獻蔬食酒漿者取以賜  
帝曰此田家味也從臣英國公張輔尚書蹇義大學士  
楊士奇楊榮金幼孜楊溥請見行殿太后慰勞之且曰  
爾等先朝舊人勉輔嗣君他日帝謂士奇曰皇太后謁

陵還道汝輩行事甚習言輔武臣也達大義義重厚小  
心第寡斷汝克正言無避忤先帝或數不樂然終從汝  
以不敗事又有三事時悔不從也太后遇外家嚴弟昇  
至薄謹然不許預議國事宣宗崩英宗方九歲宮中訛  
言將召立襄王矣太后趣召諸大臣至乾清宮指太子  
泣曰此新天子也羣臣呼萬歲浮言乃息大臣請太后  
垂簾聽政太后曰毋壞祖宗法第悉罷一切不急務時  
時勗帝向學委任股肱以故王振雖寵於帝終太后世

不敢專大政正統七年十月崩當大漸召士奇溥入命  
中官問國家尚有何大事未辦者士奇舉三事一謂建  
庶人雖亡當修實錄一謂太宗詔有收方孝孺諸臣遺  
書者死宜弛其禁其三未及奏上而太后已崩遺詔勉  
大臣佐帝惇行仁政語甚諄篤上尊諡曰誠孝恭肅明  
德弘仁順天啓聖昭皇后合葬獻陵祔太廟

宣宗恭讓皇后胡氏名善祥濟寧人永樂十五年選為  
皇太孫妃已為皇太子妃宣宗即位立為皇后時孫貴

妃有寵后未有子又善病三年春帝令后上表辭位乃  
退居長安宮賜號靜慈仙師而冊貴妃為后諸大臣張  
輔蹇義夏原吉楊士奇楊榮等不能爭張太后閔后賢  
常召居清寧宮內廷朝宴命居孫后上孫后常怏怏正  
統七年十月太皇太后崩后痛哭不已踰年亦崩用嬪  
御禮葬金山后無過被廢天下聞而憐之宣宗後亦悔  
嘗自解曰此朕少年事天順六年孫太后崩錢皇后為  
英宗言后賢而無罪廢為仙師其沒也人畏太后殮葬

皆不如禮因勸復其位號英宗問大學士李賢賢對曰  
陛下此心天地鬼神實臨之然臣以陵寢享殿神主俱  
宜如奉先殿式庶稱陛下明孝七年七月上尊諡曰恭  
讓誠順康穆靜慈章皇后修陵寢不祔廟

宣宗孝恭皇后孫氏鄒平人幼有美色父忠永城縣主  
簿也誠孝皇后母彭城伯夫人故永城人時時入禁中  
言忠有賢女遂得入宮方十餘歲成祖命誠孝后有之  
已而宣宗婚詔選濟寧胡氏為妃而以孫氏為嬪宣宗

即位封貴妃故事皇后金寶金冊貴妃以下有冊無寶妃有寵宣德元年五月帝請於太后制金寶賜焉貴妃有寶自此始妃亦無子陰取宮人子為己子即英宗也由是眷寵益重胡后上表遜位請早定國本妃偽辭曰后病瘞自有子吾子敢先后子耶三年三月胡后廢遂冊為皇后英宗立尊為皇太后英宗北狩太后命郕王監國景帝即位尊為上聖皇太后時宣宗在迤北數寄御寒衣裘及還幽南宮太后數入省視石亨等謀奪門

先密白太后許之英宗復辟上徽號曰聖烈慈壽皇太后明興宮闈徽號亦自此始天順六年九月崩上尊諡曰孝恭懿憲慈仁莊列齊天配聖章皇后合葬景陵祔太廟而英宗生母人卒無知之者

吳太后景帝母也丹徒人宣宗為太子時選入宮宣德三年封賢妃景帝即位尊為皇太后英宗復辟復稱宣廟賢妃成化中薨

郭嬪名愛字善理鳳陽人賢而有文入宮二旬而卒自

知死期書楚聲以自哀詞曰修短有數兮不足較也生而如夢兮死則覺也先吾親而歸兮慚予之失孝也心悽悽而不能已兮是則可悼也正統元年八月追贈皇庶母惠妃何氏為貴妃諡端靜趙氏為賢妃諡純靜吳氏為惠妃諡貞順焦氏為淑妃諡莊靜曹氏為敬妃諡莊順徐氏為順妃諡貞惠袁氏為麗妃諡恭定諸氏為淑妃諡貞靜李氏為充妃諡恭順何氏為成妃諡肅僖冊文曰茲委身而蹈義隨龍馭以上賓宜薦徽稱用彰



節行蓋宣宗殉葬宮妃也初太祖崩宮人多從死者建文永樂時相繼優恤若張鳳李衡趙福張壁汪賓諸家皆自錦衣衛所試百戶散騎帶刀舍人進千百戶帶奉世襲人謂之太祖朝天女戶厯成祖仁宣二宗亦皆用殉景帝以郕王薨猶用其制蓋當時王府皆然至英宗遺詔始罷之

英宗孝莊皇后錢氏海州人正統七年立為后帝憫后族單微欲侯之后輒遜謝故后家獨無封英宗北狩傾

中宮貲佐迎駕夜哀泣籲天倦即臥地損一股以哭泣  
復損一目英宗在南宮不自得后曲為慰解后無子周  
貴妃有子立為皇太子英宗大漸遺命曰錢皇后千秋  
萬歲後與朕同葬大學士李賢退而書之冊憲宗立上  
兩宮徽號下廷臣議太監夏時希貴妃意傳諭獨尊貴  
妃為皇太后大學士李賢彭時力爭乃兩宮並爭而稱  
后為慈懿皇太后及營裕陵賢時請營三壙下廷議夏  
時復言不可事竟寢成化四年六月太后崩周太后不

欲后合葬帝使夏時懷恩召大臣議彭時首對曰合葬裕陵主祔廟定禮也翼日帝召問時對如前帝曰朕豈不知慮他日妨母后耳時曰皇上孝事兩宮聖德彰聞禮之所合孝之所歸也商輅亦言不祔葬損聖德劉定之曰孝從義不從命帝默然久之曰不從命尚得為孝耶時力請合葬裕陵左而虛右以待周太后已復與大臣疏爭帝再下廷議吏部尚書李秉禮部尚書姚夔集廷臣九十九人議皆請如時言帝曰卿等言是顧朕屢

請太后未得命乖禮非孝違親亦非孝明日詹事柯潛  
給事中魏元等上疏又明日夔等合疏上皆執議如初  
中旨猶諭別擇葬地於是百官伏哭文華門外帝命羣  
臣退衆叩頭不得旨不敢退自己至申乃得允衆呼萬  
歲出事詳時夔傳中是年七月上尊諡曰孝莊獻穆弘  
惠顯仁恭天欽聖睿皇后祔太廟九月合葬裕陵異隧  
距英宗元堂數丈許中室之虛右曠以待周太后其隧  
獨通而奉先殿祭亦不設后主弘治十七年周太后崩

孝宗御便殿出裕陵圖示大學士劉健謝遷李東陽曰  
陵有二隧若者窒若者可通往來皆先朝內臣所為此  
未合禮昨見成化間彭時姚夔等章奏先朝大臣為國  
如此先帝亦不得已耳欽天監言通隧上千先帝陵堂  
恐動地脉朕已面折之窒則天地閉塞通則風氣流行  
健等因力贊帝復問祔廟禮健等言祔二后自唐始也  
祔三后自宋始也漢以前一帝一后曩者定議合祔孝  
莊太后居左今大行太皇太后居右且引唐宋故事為

証臣等以此不敢復論帝曰二后已非况復三后遷曰  
宋祔三后一繼立一生母也帝曰事湏師古太皇太后  
鞠育朕躬朕豈敢忘顧私情耳祖宗來一帝一后今並  
祔壞禮自朕始且奉先殿祭皇祖特座一飯一匙而已  
夫孝穆皇太后朕生母也別祀之奉慈殿今仁壽宮前  
殿稍寬朕欲奉太皇太后於此他日奉孝穆皇太后於  
後歲時祭享如太廟於是命羣臣詳議議上將建新廟  
欽天監奏年方有礙廷議請暫祀周太后於奉慈殿稱

孝肅太皇太后殿在奉先殿西帝以祀孝穆至是中奉  
孝肅而徙孝穆居左焉帝始欲通隧亦以陰陽家言不  
果行

孝肅周太后英宗妃憲宗生母也昌平人天順元年封  
貴妃憲宗即位尊為皇太后其年十月太后誕日帝令  
僧道建齋祭禮部尚書姚夔帥羣臣詣齋所為太后祈  
福給事中張寧等劾之帝是其言令自後僧道齋醮百  
官不得行香二十三年四月上徽號曰聖慈仁壽皇太

后孝宗立尊為太皇太后先是憲宗在位事太后至孝  
五日一朝燕享必親太后意所欲惟恐不懽至錢太后  
合葬裕陵太后殊難之憲宗委曲寬譬乃得請孝宗生  
西宮母妃紀氏薨太后育之宮中省視萬方及孝宗即  
位事太后亦至孝太后病瘍久之愈誥諭羣臣曰自英  
皇厭代予正位長樂憲宗皇帝以天下養二十四年猶  
一日茲予偶患瘍皇帝夜籲天為予請命春郊罷宴問  
視惟勤俾老年疾體獲底康寧以首視今父子兩世孝



同一揆予甚嘉焉弘治十一年冬清寧宮災太后移居  
仁壽宮明年清寧宮成廼還居焉太后弟長寧伯彥家  
有賜田有司請釐正之帝未許也太后曰柰何以我故  
亂皇帝法使歸地於官弘治十七年三月崩謚孝肅貞  
順康懿光列輔天承聖睿皇后合葬裕陵以太學士劉  
健謝遷李東陽議別祀於奉慈殿不祔廟仍稱太皇太  
后嘉靖十五年與紀邵二太后並移祀陵殿題主曰皇  
后不繫帝謚以別嫡庶其後穆宗母孝恪神宗母孝定

光宗母孝靖熹宗母孝和莊烈帝母孝純咸遵用其制  
景帝廢后汪氏順天人正統十年冊為郕王妃十四年  
冬王即皇帝位冊為皇后后有賢德嘗念京師諸死事  
及老弱遇害者暴骨原野令官校掩理之生二女無子  
景泰三年妃杭氏生子見濟景帝欲立為太子而廢憲  
宗后執不可以是忤帝帝遂廢后立杭氏為皇后七年  
杭后崩謚肅孝英宗復位削皇后號毀所葬陵而后仍  
稱郕王妃景帝崩英宗以其後宮唐氏等殉議及后李

賢曰妃已幽廢況兩女幼尤可憫帝乃已憲宗復立為太子雅知后不欲廢立事之甚恭因為帝言遷之外王府得盡攜宮中所有而出與周太后相得甚歡歲時入宮教家人禮然性剛執一日英宗問太監劉桓曰記有玉玲瓏繫腰今何在桓曰當在妃所英宗命索之后投諸井對使者曰無之已而告人曰七年天子不堪消受此數片玉耶已有言后出所攜鉅萬計英宗遣使檢取之遂立畫正德元年十二月薨議祭葬禮大學士王鏊

曰葬以妃祭以后遂合葬金山明年上尊諡曰貞惠安和景皇后

憲宗廢后吳氏順天人天順八年七月立為皇后先是憲宗居東宮萬貴妃已擅寵后既立摘其過杖之帝怒下詔曰先帝為朕簡求賢淑已定王氏育於別宮待期太監牛玉輒以選退吳氏於太后前復選冊立禮成之後朕見舉動輕佻禮度率略德不稱位因察其實始知非預立者用是不得已請命太后廢吳氏別宮立甫踰

月耳后父俊先授都督同知至是下獄戍邊謫王孝陵  
種萊玉從子太常少卿綸甥吏部員外郎楊琮並除名  
姻家懷寧侯孫鏜閒住於是南京給事中王徽王淵朱  
寬李翔李鈞等合疏言玉罪重罰輕因並劾大學士李  
賢帝怒徽等皆貶邊州判官後孝宗生於西宮后保抱  
惟謹孝宗即位念后恩令服膳皆如母后禮官其姪錦  
衣百戶正德元年薨劉瑾欲焚之大學士王鏊持不可  
乃以妃禮葬

孝貞皇后王氏上元人憲宗在東宮英宗為擇配得十  
二人選后及吳氏栢氏留宮中吳氏既立而廢遂冊為  
皇后天順八年十月也萬貴妃寵冠後宮后處之淡如  
孝宗即位尊為皇太后武宗即位尊為太皇太后正德  
五年十二月上尊號曰慈聖康壽十三年二月崩上尊  
謚曰孝貞莊懿恭靖仁慈欽天輔聖純皇后合葬茂陵  
祔太廟

孝穆紀太后孝宗生母也賀縣人本蠻土官女成化中

征蠻俘入掖廷授女史警敏通文字命守內藏時萬貴妃專寵而妬後宮有娠者皆治使墮栢賢妃生悼恭太子亦為所害帝偶行內藏應對稱旨悅幸之遂有身萬貴妃知而恚甚令婢鉤治之婢謬報曰病瘡乃謫居安樂堂久之生孝宗使門監張敏溺焉敏驚曰上未有子柰何棄之稍哺粉餌飴蜜藏之他室貴妃曰伺無所得至五六歲未取剪胎髮時吳后廢居西內近安樂堂密知其事往來哺養帝不知也帝自悼恭太子薨後久無

嗣中外皆以為憂成化十一年帝召張敏櫛髮照鏡嘆曰老將至而無子敏伏地曰死罪萬歲已有子也帝愕然問安在對曰奴言即死萬歲當為皇子主於是太監懷恩頓首曰敏言是皇子潛養西內今已六歲矣匿不敢聞帝大喜即日幸西內遣使往迎皇子使至妃抱皇子泣曰兒去吾不得生兒見黃袍有鬚者即兒父也衣以小緋袍乘小輿擁至堦下髮披地走投帝懷帝置之膝撫視久之悲喜泣下曰我子也類我使懷恩赴內閣



具道其故羣臣皆大喜明日入賀頒詔天下移妃居永壽宮數召見萬貴妃日夜怨泣曰羣小給我其年六月妃暴薨或曰貴妃致之死或曰自縊也諡恭恪莊僖淑妃敏懼亦吞金死敏同安人孝宗既立為皇太子時孝肅皇太后居仁壽宮語帝曰以兒付我太子遂居仁壽一日貴妃召太子食孝肅謂太子曰兒去無食也太子至貴妃賜食曰已飽進羹曰疑有毒貴妃大恚曰是兒數歲卽如是他日魚肉我矣因恚而成疾孝宗卽位追

謚淑妃為孝穆慈慧恭恪莊僖崇天承聖純皇后遷葬茂陵別祀奉慈殿帝悲念太后特遣太監蔡用求太后家得紀父貴紀祖旺兄弟以聞帝太喜詔改父貴為貴授錦衣衛指揮同知祖旺為旺授錦衣衛指揮僉事賜子第宅金帛莊田奴婢不可勝計追贈太后父為中軍都督府左都督母為夫人其曾祖祖父亦如之遣修太后先塋之在賀者置守墳戶復其家先是太后在宮中嘗自言家賀縣姓紀幼不能知親族也太監郭鏞聞而

識之太監陸愷者亦廣西人故姓李蠻中紀李同音因妄稱太后兄令人訪其族人詣京師愷女兄夫韋父成者出冒之有司待以戚畹名所居里曰迎恩里貴旺曰韋猶冒李况我實李氏因詐為宗系上有司有司莫辨也二人既驟貴父成亦詣闕爭辨帝命郭鏞按之鏞逐父成猶令馳驛歸及帝使治后先塋蠻中李姓者數輩皆稱太后家自言於使者使者還奏貴旺不實復遣給事中孫珪御史滕祐間行連賀間微服入猺獞中訪之

盡得其狀歸奏帝謫罰鑪等有差戾貴旺邊海自此帝  
數求太后家竟不得弘治三年禮部尚書耿裕奏曰粵  
西當大征之後兵燹饑荒人民兵竄歲月悠遠踪跡難  
明昔孝慈高皇后與高皇帝同起艱難化家為國徐王  
親高皇后父當后之身尋求家族尚不克獲然後立廟  
宿州春秋祭祀今紀太后幼離西粵入侍先帝連賀非  
徐宿中原之地嬪宮無母后正位之年陛下訪尋雖切  
安從得其實哉臣愚謂可做徐王故事定擬太后父母

封號立祠桂林致祭帝曰孝穆皇太后早棄朕躬每一  
思念怒焉如割初謂宗親尚可旁求寧受百欺冀獲一  
是卿等謂歲久無從物色請加封立廟以慰聖母之靈  
皇祖既有故事朕心雖不忍又奚敢違於是封后父推  
誠宣力武臣特進光祿大夫柱國慶元伯謚端僖后母  
伯夫人立廟桂林府有司歲時祀太學士尹直撰哀冊  
有云觀漢家堯母之門增宋室仁宗之慟帝燕閒念誦  
輒歔歔流涕也

孝惠邵太后憲宗妃興獻帝母也父林昌化人貧甚鬻女於杭州鎮守太監妃由此入宮知書有容色成化十二年封宸妃尋進封貴妃興王之藩妃不得從世宗入繼大統妃已老目眚矣喜孫為皇帝摸世宗身自頂至踵已尊為皇太后嘉靖元年上尊號曰壽安十一月崩帝欲明年二月遷葬茂林大學士楊廷和等言祖陵不當數興工作驚動神靈不從謚曰孝惠康肅溫仁懿順協天祐聖皇太后別祀奉慈殿七年七月改稱太皇太

后十五年遷主陵殿稱皇后與孝肅孝穆等

恭肅貴妃萬氏諸城人四歲選入掖廷為孫太子宫女  
及長侍憲宗於東宮憲宗年十六即位妃已三十有五  
機警善迎帝意遂譖廢皇后吳氏六宮希得進御帝每  
遊幸妃戎服前驅成化二年正月生皇第一子帝大喜  
遣中使祀諸山川遂封貴妃皇子未期薨妃亦自是不  
復娠矣當是時帝未有子中外以為憂言者每請溥恩  
澤以廣繼嗣給事中李森魏元御史康永韶等先後言

尤切四年秋慧星屢見大學士彭時尚書姚夔亦以為  
言帝曰內事也朕自主之然不能用妃益驕中官用事  
者一忤意立見斥逐掖廷御幸有身飲藥傷墜者無數  
孝宗之生頂寸許無髮或曰藥所中也紀淑妃之死實  
妃為之倭倖錢能卑勤汪直梁芳韋興輩皆假貢獻苛  
歛民財傾竭府庫以結貴妃歡奇技淫巧禱祠宮觀糜  
費無算久之帝後宮生子漸多芳等懼太子年長他日  
立將治己罪同導妃勸帝易儲會泰山震占者謂應在



東宮帝心懼事乃寢二十三年春暴疾薨帝輟朝七日  
謚曰恭肅端慎榮靖王貴妃薨天壽山弘治初御史曹  
璘請削妃謚號魚臺縣丞徐頊請逮治診視紀太后諸  
醫捕萬氏家屬究問當時薨狀孝宗以重違先帝意已  
之

明史卷一百十三

欽定四庫全書

明史卷一百十四

大學士張廷玉等奉 敕修

列傳第二

后妃二

孝忠孝康張皇后

孝宗孝靜夏皇后

世宗孝潔陳皇后

張廢后

孝烈方皇后

孝恪杜太后

穆宗孝懿李皇后

孝安陳太后

孝定李太后

神宗孝端王皇后

劉昭妃

孝靖王太后

鄭貴妃

光宗孝元郭皇后

孝和王太后

孝純李太后

李康妃

李莊妃

趙選侍

熹宗懿安張皇后

張裕妃

莊烈帝愍周皇后

田貴妃

孝宗孝康皇后張氏興濟人父巒以鄉貢入太學母金氏夢月入懷而生后成化二十三年選為太子妃是年孝宗即位冊立為皇后帝頗優禮外家追封巒昌國公封后弟鶴齡壽寧侯延齡建昌伯為后享家廟於興濟工作壯麗數年始畢鶴齡延齡竝注籍宮禁縱家人為奸利中外諸臣多以為言帝以后故不問武宗即位尊

為皇太后五年十二月以賓鐸平上尊號曰慈壽皇太  
后世宗入繼稱聖母加上尊號曰昭聖慈壽嘉靖三年  
加上昭聖康惠慈壽已改稱伯母十五年復加上昭聖  
恭安康惠慈壽二十年八月崩謚曰孝康靖肅莊慈哲  
懿翊天贊聖敬皇后合葬泰陵祔廟武宗之崩也江彬  
等懷不軌賴后與大學士楊廷和定策禁中迎立世宗  
而世宗事后顧日益薄元年大婚初傳昭聖懿旨既復  
改壽安太后壽安者憲宗妃興獻帝生母也廷和爭之

乃止三年興國太后誕節敕命婦朝賀燕賚倍常及后  
誕日敕免賀修撰舒芬疏諫奪俸御史朱泚馬明衡陳  
逅季本員外郎林惟聰等先後言皆得罪竟罷朝賀初  
興國太后以藩妃入太后猶以故事遇之帝頗不悅及  
帝朝太后待之又倨會太后弟延齡為人所告帝坐延  
齡謀逆論死太后窘迫無所出哀沖太子生請入賀帝  
謝不見使人請不許大學士張孚敬亦為延齡請帝手  
敕曰天下者高帝之天下孝宗皇帝守高皇帝之法卿

慮傷伯母心豈不慮傷高孝二廟心耶孚敬復奏曰陛下嗣位時用臣言稱伯母皇太后朝臣歸過陛下至今未已茲者大小臣工默無一言誠幸太后不得令終以重陛下過耳夫謀逆之罪獄成當坐族誅昭聖獨非張氏乎陛下何以處此冬月慮囚帝又欲殺延齡復以孚敬言而止亡何奸人劉東山者告變并逮鶴齡下詔獄太后至衣敝襦席藁為請亦不聽久之鶴齡瘐死及太后崩帝竟殺延齡事詳外戚傳



武宗孝靜皇后夏氏上元人正德元年冊立為皇后嘉靖元年上尊號曰莊肅皇后十四年正月崩合葬康陵祔廟初禮臣上喪儀帝曰嫂叔無服且兩宮在上朕服青臣民如母后服禮部尚書夏言曰皇上以嫂叔絕服則羣臣不敢素服見皇上請暫罷朝參許之己而議謚大學士張孚敬曰大行皇后上嫂也與累朝元后異宜用二字或四字李時曰宜用八左都御史王廷相吏部侍郎霍韜等曰均帶后也何殊言集衆議因奏曰古人

尚質謚法簡稱其行後人增加臣子情也生今世宜行  
今制大行皇后宜如列聖元后謚二四及八於禮無據  
帝不從命再議羣臣請如孚敬言帝曰用六合陰數焉  
於是上謚孝靜莊惠安肅毅皇后十五年帝覺孚敬言  
非是敕曰孝靜皇后謚不備不稱配宗乃改謚孝靜  
莊惠安肅溫誠順天偕聖毅皇后

世宗孝潔皇后陳氏元城人嘉靖元年冊立為皇后帝  
性嚴厲一日與后同坐張方二妃進茗帝循視其手后

恚投杯起帝大怒后驚怖墮娠崩七年十月也喪禮從  
殺帝素服御西角門十日即元冠元裳御奉天門謚曰  
悼靈葬襖兒峪葬之日梓宮出王門百官一日臨給侍  
中王汝梅諫不聽十五年禮部尚書夏言議請改謚時  
帝意久釋矣乃改謚曰孝潔穆宗即位禮臣議孝潔皇  
后大行皇帝元配宜合葬祔廟若遵遺制祔孝烈則舍  
元配也若同祔則二后也大行皇帝升祔時宜奉孝潔  
配遷葬永陵孝烈主宜別祀報可隆慶元年二月上尊

謚曰孝潔恭懿慈睿安莊相天翊聖肅皇后

張氏世宗第二后也初封順妃七年陳皇后崩遂立為后是時帝方追古禮令后率嬪御親蠶北郊又日率六宮聽講章聖女訓於宮中十三年正月廢居別宮十五年薨喪葬儀視宣宗胡廢后

孝烈皇后方氏世宗第三后也江寧人帝即位且十年未有子大學士張孚敬言古者天子立后並建六宮三夫人九嬪二十七世婦八十一御妻所以廣嗣也陛下

春秋鼎盛宜博求淑女為子嗣計從之十年三月后與鄭氏王氏閻氏韋氏沈氏羅氏沈氏杜氏同冊為九嬪冠九翟冠大采鞠衣圭用次玉黻文冊黃金塗視皇后殺五分之一至期帝袞冕告太廟還服皮弁御華蓋殿傳制遣大臣行冊禮既冊從皇后朝奉先殿禮成帝服皮弁受百官賀蓋創禮也張后廢遂立為后而封沈氏為宸妃閻氏為麗妃舊制立后謁內廟而已至是下禮臣議廟見禮於是羣臣以天子立三宮以承宗廟禮經

有廟見之文乃考據禮經參稽大明集禮擬儀注以上  
至期帝率后謁太廟及世廟越三日頒詔天下明日受  
命婦朝二十一年宮婢楊金英等謀弑逆帝賴后救自  
免乃進后父泰和伯銳爵為侯初曹妃有色帝愛之冊  
為端妃是夕帝宿端妃宮金英等伺帝熟寢以組縊帝  
項誤為死結得不絕同事張金蓮知事不就走告后后  
馳至解組帝蘇后命內監張佐等捕宮人雜治言金英  
等弑逆王寧嬪首謀又曰曹端妃雖不與亦知謀時帝

病懣不能言后傳帝命收端妃寧嬪及金英等悉磔於市并誅其族屬十餘人然妃實不知也久之帝始知其冤二十六年十一月乙未后崩詔曰皇后比救朕危奉天濟難其以元后禮葬預名葬地曰永陵謚孝烈親定謚禮視昔加隆焉禮成頒詔天下及大祥禮臣請安主奉先殿東夾室帝曰奉先殿夾室非正也可即祔太廟於是大學士嚴嵩等請設位於太廟東皇妣睿皇后之次後寢藏主則設幄於獻廟皇祖妣之右以從祔於祖

姑之義帝曰祔禮至重豈可權就后非帝乃配帝者自有一定之序安有享從此而主藏彼之禮其桃仁宗祔以新序即朕位次勿得亂禮嵩曰祔新序非臣下所敢言且陰不可當陽位乃命姑藏主睿皇后側二十九年十月帝終欲附后太廟命再議尚書徐階言不可給事中楊思忠是階議餘無言者帝覘知狀及議疏入謂后正位中宮禮宜祔享但遽及廟次則臣子之情不唯不敢實不忍也宜設位奉先殿帝震怒階思忠惶恐言周



建九廟三昭三穆國朝廟制同堂異室與周禮不同今  
太廟九室俱滿若以聖躬論仁宗當祧固不待言但此  
乃異日聖子神孫之事臣聞夏人之廟五商以七周以  
九禮以義起五可七七可九九之外亦可加也請於太  
廟及奉先殿各增二室以祔孝烈則仁宗可不祧孝  
烈皇后可速正南面之位陛下亦無預祧以俟之嫌帝  
曰臣子之誼當祧當祔力請可也苟禮得其正何避預  
為於是階等復會廷臣上言唐虞夏五廟其祀皆止四

世周九廟三昭三穆然而兄弟相及亦不能盡足六世  
今仁宗為皇上五世祖以聖躬論仁宗於禮當祧孝烈  
皇后於禮當祧請祧仁宗祧孝烈皇后於太廟第九室  
因上祧祔儀注已而請忌日祭帝猶銜前議報曰孝烈  
繼后所奉者又入繼之君忌不祭亦可階等請益力帝  
曰非天子不議禮后當祔廟居朕室次禮官顧謂今日  
未宜徒飾說以惑衆聽因諭嚴嵩等曰禮官從朕言勉  
強耳即不忍祧仁宗且置后主別廟將來由臣下議處

忌日令奠一卮酒不至傷情於是禮臣不敢復言第請如敕行乃許之後二年楊思忠為賀表觸忌予杖削籍隆慶初與孝潔皇后同日上尊謚曰孝烈端順敏惠恭誠祇天衛聖皇后移主弘孝殿

孝恪杜太后穆宗生母也大興人嘉靖十年封康嬪十五年進封妃三十三年正月薨是時穆宗以裕王居邸禮部尚書歐陽德奏喪禮請輟朝五日裕王主喪事遵高皇孝慈錄斬衰三年帝曰當避君父之尊大學士

嚴嵩言高帝命周王橚為孫貴妃服慈母服斬衰三年  
是年孝慈錄成遂為定制自後久無是事及茲當作則  
垂訓於後帝命比賢妃鄭氏故事輟朝二日賜謚榮淑  
葬金山穆宗立上諡曰孝恪淵純慈懿恭順贊天開聖  
皇太后遷葬永陵祀主神霄殿追封后父林為慶都伯  
命其子繼宗嗣

穆宗孝懿皇后李氏昌平人穆宗為裕王遷為妃生憲  
懷太子嘉靖三十七年四月薨帝以部疏稱薨非制命

改稱故葬金山穆宗即位謚曰孝懿皇后封后父銘德  
平伯神宗即位上尊謚曰孝懿貞惠順哲恭仁儷天襄  
聖莊皇后合葬昭陵祔太廟

孝安皇后陳氏通州人嘉靖三十七年九月選為裕王  
繼妃隆慶元年冊為皇后后無子多病居別宮神宗即  
位上尊號曰仁聖皇太后六年加上貞懿十年加康靜  
初神宗在東宮每晨謁奉先殿朝帝及生母畢必至后  
所問安后聞履聲輒喜既嗣位孝事兩宮無間二十四

年七月崩謚曰孝安貞懿恭純溫惠佐天弘聖皇后祀  
奉先殿別室

孝定李太后神宗生母也涪縣人侍穆宗於裕邸隆慶  
元年三月封貴妃生神宗即位上尊號曰慈聖皇太后  
舊制天子立尊皇后為皇太后若有生母稱太后者則  
加徽號以別之是時太監馮保欲媚貴妃因以並尊風  
大學士張居正下廷臣議尊皇后曰仁聖皇太后貴妃  
曰慈聖皇太后始無別矣仁聖居慈慶宮慈聖居慈寧

宮居正請太后視帝起居乃徙居乾清宮太后教帝頗嚴帝或不讀書即召使長跪每御講筵入嘗令效講臣進講於前遇朝期五更至帝寢所呼曰帝起敕左右掖帝坐取水為盥面挈之登輦以出帝事太后惟謹而諸內臣奉太后旨者往往挾持太過帝嘗在西城曲宴被酒令內侍歌新聲辭不能取劍擊之左右勸止乃戲割其髮翼日太后聞傳語居正具疏切諫令為帝草罪己御札又召帝長跪數其過帝涕泣請改乃己六年帝大

婚太后將返慈寧宮敕居正曰吾不能視皇帝朝夕先生親受先帝付託其朝夕納誨終先帝憑几之誼三月加尊號曰宣文十年加明肅十二年同仁聖太后謁山陵二十九年加貞壽端獻三十四年加恭禧四十二年二月崩上尊謚曰孝定貞純欽仁端肅弼天祚聖皇太后合葬昭陵別祀崇先殿后性嚴明萬厯初政委任張居正綜覈名實幾於富强后之力居多光宗之未冊立也給事中姜應麟等疏請被謫太后聞之弗善一日帝



入侍太后問故帝曰彼都人子也太后大怒曰爾亦都人子帝惶恐伏地不敢起蓋內廷呼宮人曰都人太后亦由宮人進故云光宗由是得立羣臣請福王之藩行有日矣鄭貴妃欲遲之明年以祝太后誕為解太后曰吾潞王亦可來上壽乎貴妃乃不敢留福王御史曹學程以建言論死太后憐其母老言于帝釋之后父偉封武清伯家人嘗有過命中使出數之而抵其家人於法顧好佛京師內外多置梵刹動費鉅萬帝亦助施無算

居正在日常以為言未能用也

神宗孝端皇后王氏餘姚人生京師萬厯六年冊立為  
皇后性端謹事孝定太后得其懽心光宗在東宮危疑  
者數矣調護備至鄭貴妃顯寵后不較也正位中宮者  
四十二年以慈孝稱四十八年四月崩謚孝端光宗即  
位上尊謚曰孝端真恪莊惠仁明婉天毓聖顯皇后會  
帝崩熹宗立始上冊寶合葬定陵主附廟與后同日冊  
封者有昭妃劉氏天啟崇禎時嘗居慈寧宮掌太后璽

性謹厚撫愛諸王莊烈帝禮事之如大母嘗以歲朝朝見帝就便坐俄假寐太后戒勿驚命尚衣謹護之頃之帝覺攝衣冠起謝曰神祖時海內少事今苦多難兩夜省文書未嘗交睫在太妃前困不自持如此太妃為之泣下崇禎十五年薨年八十有六

孝靖皇太后光宗生母也初為慈寧宮宮人年長矣帝過慈寧私幸之有身故事宮中承寵必有賞賚文書房內侍記年月及所賜以為驗時帝諱之故左右無言者

一日侍慈聖宴語及之帝不應慈聖命取內起居注示帝且好語曰吾老矣猶未有孫果男者宗社福也母以子貴寧分差等耶十年四月封恭妃八月光宗生是為皇長子既而鄭妃生皇三子進封皇貴妃而而恭妃不進封二十九年冊立皇長子為皇太子仍不封如故三十四年元孫生加慈聖徽號始進封皇貴妃四十年病革光宗請旨得往省宮門猶閉挾鑰而入妃目青手光宗衣而泣曰兒長大如此我死何恨遂薨大學士葉向

高言皇太子母妃薨禮宜從厚不報復請乃得允謚溫  
肅端靖純懿皇貴妃葬天壽山光宗即位下詔曰朕嗣  
承繼緒撫臨萬方邇厥慶源則我生母溫肅端靖純懿  
皇貴妃恩莫大焉朕昔在青宮莫親溫清今居禁闥徒  
痛枯槁欲伸罔極之深悰惟有肇稱乎殷禮其準皇祖  
穆宗皇帝尊生母榮淑康妃故事禮部詳議以聞會崩  
熹宗即位上尊謚曰孝清溫懿恭讓貞慈參天允聖皇  
太后遷葬定陵祀奉慈殿后父天瑞封永寧伯

恭恪貴妃鄭氏大興人萬厯初入宮封貴妃生皇三子進皇貴妃帝寵之外廷疑妃有立已子謀羣臣爭言立儲事章奏累數千百皆指斥宮闈攻擊執政帝概置不問由是門戶之禍大起萬厯二十九年春皇長子移迎禧宮十月立為皇太子而疑仍未已先是侍郎呂坤為按察使時嘗集閨範圍說太監陳矩見之持以進帝帝賜妃妃重刻之坤無與也二十六年秋或撰閨範圍說跋名曰憂危竑議匿其名盛傳京師謂坤書首載漢

明德馬后由宮人進位中宮意以指妃而妃之刊刻實藉此為立已子之據其文托朱東吉為問答東吉者東朝也其名憂危以坤曾有憂危一疏因借其名以諷蓋言妖也妃兄國恭姪承恩以給事中戴士衡嘗糾坤全椒知縣樊玉衡並糾貴妃疑出自二人手帝重謫二人而置妖言不問踰五年續憂危訟議復出是時太子已立大學士朱賡得是書以聞書託鄭福成為問答鄭福成者謂鄭之福王當成也大畧言帝於東宮不得已而

立他日必易其特用朱廣內閣者寔寓更易之義詞尤  
詭妄時皆謂之妖書帝大怒敕錦衣衛搜捕甚急久之  
乃得皦生光者坐極刑語詳郭正域沈鯉傳四十一年  
百戶王曰乾又告變言奸人孔學等為巫蠱將不利於  
聖母及太子語亦及妃賴大學士葉向高勸帝以靜處  
之而速福王之藩以息羣言事乃寢其後梃擊事起主  
事王之宋言張差獄情詞連貴妃宮內侍龐保劉成  
等朝議洶洶貴妃聞之對帝泣帝曰外廷語不易解若



須自求太子貴妃向太子號訴貴妃拜太子亦拜帝又  
於慈寧宮太后几筵前召見羣臣令太子降諭禁株連  
於是張差獄乃定神宗崩遺命封妃皇后禮部侍郎孫  
如游爭之乃止及光宗崩有言妃與李選侍同居乾清  
宮謀垂簾聽政者久之始息崇禎三年七月薨謚恭恪  
惠榮和靖皇貴妃葬銀泉山

光宗孝元皇后郭氏順天人父維城以女貴封博平伯  
進侯卒兄振明嗣后於萬曆二十九年冊為皇太子妃

四十一年十一月薨謚恭靖熹宗即位上尊謚曰孝元  
昭懿哲惠莊仁合天弼聖貞皇后遷葬慶陵祔廟

孝和王太后熹宗生母也順天人侍光宗東宮為選侍  
萬厯二十二年進才人四十七年三月薨熹宗即位上  
尊謚曰孝和恭獻溫穆徽慈諧天鞠聖皇太后遷葬慶  
陵祀奉先殿崇禎十一年三月以加上孝純太后尊謚  
於御用監得后及孝靖太后玉冊玉寶始命有司獻於  
廟忠賢黨王體乾坐怠玩論死蓋距上謚時十有八年

矣

孝純劉太后莊烈帝生母也海州人後籍宛平初入宮  
為淑女萬曆三十八年十二月生莊烈皇帝已失光宗  
意被譴薨光宗中悔恐神宗知之戒掖庭勿言葬於西  
山及莊烈帝長封信王追進賢妃時莊烈帝居勗勤宮  
問近侍曰西山有申懿王墳乎曰有傍有劉娘娘墳乎  
曰有每密付金錢往祭及即位上尊謚曰孝純恭懿淑  
穆莊靜毗天毓聖皇太后遷葬慶陵帝五歲失太后問

左右遺像莫能得傳懿妃者舊與太后同為淑女比宮居自稱習太后言宮人中狀貌相類者命后母瀛國太夫人指示畫工可意得也圖成由正陽門具法駕迎入帝跪迎於午門縣之宮中呼老宮婢視之或曰似或曰否帝雨泣六宮皆泣故事生母忌日不設祭不服青十五年六月帝以太后故欲追前代生繼七后同建一廟以展孝思乃御德政殿召大學士及禮臣入問曰太廟之制一帝一后祧廟亦然歷朝繼后及生母凡七位皆

不得與即宮中奉先殿亦尚無祭奈何禮部侍郎蔣德璟曰奉先殿外尚有奉慈殿所以奉繼后及生母者雖廢可舉也帝曰奉慈殿外尚有弘孝神霄本恩諸殿德璟曰內廷規制臣等未悉孝宗建奉慈殿嘉靖間廢之今未知尚有舊基否帝曰奉慈已撤惟奉先尚可拓也於是別置一殿祀孝純及七后云

康妃李氏光宗選侍也時宮中有二李選侍人稱東西李康妃者西李也最有寵嘗撫視熹宗及莊烈帝光宗

即位不豫召大臣入帝御煖閣凭几命封選侍為皇貴妃選侍趣熹宗出曰欲封后帝不應禮部侍郎孫如游奏曰今兩太后及元妃才人諡號俱未上俟四大禮舉行後未晚既而帝崩選侍尚居乾清宮外廷恟懼疑選侍欲聽政大學士劉一燝吏部尚書周嘉謨兵科都給事中楊漣御史左光斗等上疏力爭選侍移居仁壽殿事詳一燝漣傳熹宗即位降敕暴選侍凌毆聖母因致崩逝及妄覲垂簾狀而御史賈繼春進安選侍揭與周

朝瑞爭駁不已帝復降敕曰九月一日皇考賓天大臣  
入宮哭臨畢因請朝見選侍阻朕煖閣司禮監官固請  
乃得出既許復悔又使李進忠等再三趣回及朕至乾  
清丹陛進忠等猶牽朕衣不釋甫至前宮門又數數遣  
人令朕還毋御文華殿也此諸臣所目觀察選侍行事  
明欲要挾朕躬垂簾聽政朕蒙皇考令選侍撫視飲膳  
衣服皆皇祖皇考賜也選侍侮慢凌虐朕晝夜涕泣皇  
考自知其誤時加勸慰若避宮不早則爪牙成列朕且

不知若何矣選侍因毆崩聖母自忖有罪每使宮人竊伺不令朕與聖母舊侍言有輒捕去朕之苦衷外廷豈能盡悉乃諸臣不念聖母惟黨選侍妄生謗議輕重失倫理法焉在朕今停選侍封號以慰聖母在天之靈厚養選侍及皇八妹以敬遵皇考之意爾諸臣可以仰體朕心矣已復屢旨詰責繼春繼春遂削籍去是時熹宗初即位委任司禮太監王安故敕諭如此久之魏忠賢亂政四年封選侍為康妃五年修三朝要典連光斗等



皆得罪死復召繼春與前旨大異矣久之始卒

莊妃李氏即所稱東李者也仁慈寡言笑位居西李前而寵不及莊烈帝幼失母育於西李既而西李生女光宗改命東李撫視天啟元年二月封莊妃魏忠賢客氏用事惡妃持正宮中禮數多被裁損憤鬱薨崇禎初詔賜妃弟成棟田產

選侍趙氏者光宗時未有封號熹宗即位忠賢客氏惡之矯旨賜選侍以光宗賜物列案上西向禮佛痛

哭自經死

熹宗懿安皇后張氏祥符人父國紀以女貴封太康伯天啟元年四月冊為皇后性嚴正數於帝前言客氏魏忠賢過失嘗召客氏至欲繩以法客魏交恨遂誣后非國紀女幾惑帝聽三年后有娠客魏盡逐宮人異已者而以其私人承奉竟損元子帝嘗至后宫后方讀書帝問何書對曰趙高傳也帝默然時宮門有匿名書列忠賢逆狀者忠賢疑出國紀及被逐諸臣手其黨邵輔忠

孫杰等欲因此興大獄盡殺東林諸臣而借國紀以搖動中宮冀事成則立魏良卿女為后順天府丞劉志選偵知之首上疏劾國紀御史梁夢縲繼之會有沮者乃已及熹宗大漸折忠賢逆謀傳位信王者后力也莊烈帝上尊號曰懿安皇后十七年三月李自成陷都城后自縊順治元年

世祖章皇帝命合葬熹宗陵

裕妃張氏熹宗妃也性直烈客魏恚其異已幽于別宮

絕其飲食天雨妃匍匐飲簷溜而死又慧妃范氏者生  
悼懷太子不育復失寵李成妃侍寢密為慧妃乞憐客  
魏知之怒亦幽成妃於別宮妃預藏食物簷瓦間閉宮  
中半月不死斥為宮人崇禎初皆復位號

莊烈帝愍皇后周氏其先蘇州人徙居大興天啟中選  
入信邸時神宗劉昭妃攝太后寶宮中之政悉稟成於  
熹宗張皇后故事宮中選大婚一后以二貴人陪中選  
則皇太后幕以青紗帕取金玉跳脫繫其臂不中即以

年月帖子納淑女袖脩以銀幣遣還懿安疑后弱昭妃  
曰今雖弱後必長大因冊為信王妃帝即位立為皇后  
后性嚴慎嘗以冠急微言曰吾南中尚有一家居帝問  
之遂不語蓋意在南遷也至他政事則未嘗預田貴妃  
有寵而驕后裁之以禮歲元日寒甚田妃來朝翟車止  
廡下后良久方御坐受其拜拜已遽下無他言而表貴  
妃之朝也相見甚歡語移時田妃聞而大恨向帝泣帝  
嘗在交泰殿與后語不合推后仆地后憤不食帝悔使

中使持貂襜褕賜后且問起居妃尋以過斥居啟祥宮三月不召一日后侍帝於永和門看花請召妃帝不應后遽令以車迎之乃相見如初帝以寇亂茹蔬后見帝容體日瘁具饌將進而瀛國夫人奏適至曰夜夢孝純太后歸語帝瘁而泣且曰為我語帝食毋過苦帝持奏入宮后適進饌帝追念孝純且感后意因出奏示后再拜舉匕箸相向而泣淚盈盈沾案崇禎十七年三月十八日暝都城陷帝泣語后曰大事去矣后頓首曰妾事陛

下十有八年卒不聽一語至有今日乃撫太子二王慟哭遣之出宮帝令后自裁后入室闔戶宮人出奏猶云皇后領旨后遂先帝崩帝又命袁貴妃自縊繫絕久之蘇帝拔劍斫其肩又斫斫御妃嬪數人袁妃卒不殊

世祖章皇帝定鼎謚后曰莊烈愍皇后與帝同葬田貴妃寢園名曰思陵下所司給袁妃居宅膳養終其身有宮人魏氏者當賊入宮大呼曰我輩必遭賊汚有志者早為計遂躍入御河死頃間從死者一百人宮人費氏

年十六自投晉井中賊鈎出見其姿容爭奪之費氏紿  
曰我長公主也羣賊不敢逼擁見李自成自成命中官  
審視之非是以賞部校羅某者費氏復紿羅曰我實天  
潢義難苟合將軍宜擇吉行禮羅喜置酒極歡費氏懷  
利刃俟羅醉斷其喉立死因自詫曰我一弱女子殺一  
賊帥足矣遂自刎死自成聞大驚令收葬之

恭淑貴妃田氏陝西人後家揚州父弘遇以女貴官左  
都督好佚遊為輕俠妃生而纖妍性寡言多才藝侍莊



烈帝於信邸崇禎元年封禮妃進皇貴妃宮中有夾道  
暑月駕行幸御華蓋行日中妃命作遽蔭覆之從者得  
休息又易小黃門之舁輿者以宮婢帝聞以為知禮嘗  
有過謫別宮省愆所生皇五子薨於別宮妃遂病十五  
年七月薨謚恭淑端惠靜懷皇貴妃葬昌平天壽山即  
思陵也

贊曰高皇后從太祖備歷艱難贊成大業母儀天下慈  
德昭彰繼以文皇后仁孝寬和化行宮壺後世承其遺

範內治肅雍論者稱有明家法遠過漢唐信不誣矣萬  
鄭兩貴妃亦非有陰鷙之謀干政奪嫡之事徒以恃寵  
溺愛遂滋謗訕易曰閑有家悔亡苟越其閑悔將無及  
聖人之垂戒遠矣哉

欽定四庫全書

明史卷一百十五

大學士張廷玉等奉 敕修

列傳第三

興宗孝康皇帝

孝康皇后  
呂太后

睿宗獻皇帝

獻皇后

興宗孝康皇帝標太祖長子也母高皇后元至正十五年生於太平陳迪家太祖為吳王立為王世子從宋濂受經吳元年年十三矣命省臨濠墓諭曰商高宗舊勞

於外周成王早聞無逸之訓皆知小民病苦故在位勤  
儉為守成令主兇生長富貴習於晏安今出旁近郡縣  
遊覽山川經歷田野其因道途險易以知鞍馬勤勞觀  
閭閻生業以知衣食艱難察民情好惡以知風俗美惡  
即祖宗所居訪求父老問吾起兵渡江時事識之於心  
以知吾創業不易又命中書省擇官輔行凡所過都邑  
城隍山川之神皆祭以少牢過太平訪廸家賜白金五  
十兩至泗濠告祭諸祖墓是冬從太祖觀郊壇令左右

導之農家徧觀服食器具又指道旁荆楚曰古用此為  
朴刑以其能去風雖傷不殺人古人用心仁厚如此兒  
念之洪武元年正月立為皇太子帶刀舍人周宗上書  
乞教太子帝嘉納中書省都督府請倣元制以太子為  
中書令帝以元制不足法令詹同考歷代東宮官制選  
勲德老成及新進賢者兼領東宮官於是左丞相李善  
長兼太子少師右丞相徐達兼太子太傅中書平章錄  
軍國重事常遇春兼太子少保右都督馮宗異兼右詹

事中書平章政事胡廷瑞廖永忠李伯昇兼同知詹事  
院事中書左右丞趙庸王溥兼副詹事中書參政楊憲  
兼詹事丞傅瓛兼詹事同知大都督康茂才張興祖兼  
左右率府使大督都府副使顧時孫興祖同知左右率  
府事僉大都督府事吳楨昺文兼左右率府副使御  
史大夫鄧愈湯和兼諭德御史中丞劉基章溢兼贊善  
大夫治書侍御史文原吉范顯祖兼太子賓客諭之曰  
朕於東宮不別設府僚而以卿等兼領者蓋軍旅未息

朕若有事於外必太子監國若設府僚卿等在內事當  
啟聞太子或聽斷不明與卿等意見不合卿等必謂府  
僚導之嫌隙易生又所以特置賓客諭德等官者欲輔  
成太子德性且選名儒爲之職此故也昔周公教成王  
克詰戎兵召公教康王張皇六師此居安慮危不忘武  
備蓋繼世之君生長富貴昵於安逸不諳軍旅一有緩  
急用知所措二公之言其并識之是年命選國子生國  
琦王璞張傑等十餘人侍太子讀書禁中琦等入對謹

身殿儀狀明秀應對詳雅帝喜因謂殿中侍御史郭淵友等曰諸生於文藝習矣然與太子處當端其心術不流浮靡庶儲德亦獲裨助因厚賜之未幾以梁貞王儀為太子賓客秦庸盧德明張昌為太子諭德先是建大本堂取古之圖籍充其中徵四方名儒教太子諸王分番夜直選才俊之士充伴讀帝時時賜宴賦詩商榷古今評論文字無虛日命諸儒作鍾山龍蟠賦置酒歡甚自作時雪賦賜東宮官令三師諭德朝賀東宮東宮答



拜又命東宮及王府官編輯古人行事可為戒鑒者訓諭太子諸王四年春製大本堂玉圖記賜太子十年令自今政事並啟太子處分然後奏聞諭曰自古創業之君歷涉勤勞達人情周物理故處事成當守成之君生長富貴若非平昔練達少有不謬者故吾特命爾日臨羣臣聽斷諸司啟事以練習國政惟仁不失於疎暴惟明不惑於邪佞惟勤不溺於安逸惟斷不牽於文法凡此皆心為權度吾自有天下以來未嘗暇逸於諸事務

惟恐毫髮失當以負上天付託之意戴星而朝夜分而  
寢爾所親見爾能體而行之天下之福也時令儒臣為  
太子講大學衍義二十二年置詹事院二十四年八月  
敕太子巡撫陝西先是帝以應天開封為南北京臨濠  
為中都御史胡子祺上書曰天下形勝地可都者四河  
東地勢高控制西北堯嘗都之然其地苦寒汴梁襟帶  
河淮宋嘗都之然其地平曠無險可憑洛陽周公卜之  
周漢遷之然嵩卽非有穀函終南之阻澗瀍伊洛非有

涇渭灞滻之雄夫據百二河山之勝可以聳諸侯之望  
舉天下莫關中若也帝稱善至是諭太子曰天下山川  
惟秦地號爲險固汝往以省觀風俗慰勞秦父老子弟  
於是擇文武諸臣扈太子行既行使諭曰爾昨渡江震  
雷忽起於東南導爾前行是威震之兆也然一旬久陰  
不雨占有陰謀宜慎舉動嚴宿衛施仁布惠以回天意  
仍申諭從行諸臣以宿頓聞比還獻陝西地圖遂病病  
中上言經畧建都事明年四月丙子薨帝慟哭禮官議

期喪請以日易及當除服帝不忍禮官請之始釋服視朝八月庚申祔葬孝陵東謚曰懿文太子為人友愛秦周諸王數有過輒調護之得返國有告晉王異謀者太子為涕泣請帝乃感悟帝初撫兄子文正嫡子李文忠及沐英等為子高后視如已出帝或以事督過之太子輒告高后為慰解其仁慈天性然也太子元妃常氏繼妃呂氏生子五長雄英次建文皇帝次允熲次允熹次允熙建文元年追尊為孝康皇帝廟號興宗燕王即帝

位復稱懿文皇太子孝康皇后常氏開平王遇春女洪武四年四月冊為皇太子妃十一年十一月薨謚敬懿太祖為輟朝三日建文元年追尊為孝康皇后永樂元年復稱敬懿皇太子妃皇太后呂氏壽州人父本累官太常卿惠帝即位尊為皇太后燕兵至金川門迓太后至軍中迷不得已起兵之故太后還未至宮中已火既而隨其子允熙居懿文陵永樂元年復稱皇嫂懿文太子妃初太祖冊常妃繼冊呂妃常氏薨呂氏始獨居東

宮而其時秦王稜亦納王保保妹為妃又以鄧愈女為配皆前代故事所無也

睿宗興獻皇帝祐杭憲宗第四子母邵貴妃成化二十三年封興王弘治四年建邸德安已改安陸七年之藩舟次龍江有慈烏數萬繞舟至黃州復然人以為瑞謝疏陳五事孝宗嘉之賜予異諸弟王嗜詩書絕珍玩不畜女樂非公宴不設牲醴楚俗尚巫覡而輕醫藥乃選布良方設藥餌以濟病者長史張景明獻所著六益於

王賜之金帛曰吾以此懸宮門矣卽旁有臺曰陽春數  
與羣臣賓從登臨賦詩正德十四年薨謚曰獻王薨二  
年而武宗崩召王世子入嗣大統是為世宗禮臣毛澄  
等援漢定陶宋濮王故事考孝宗改稱王為皇叔父興  
獻大王王妃為皇叔母帝命廷臣集議未決進士張璁  
上書請考興獻王帝大悅會母妃至自安陸止通州不  
入帝啟張太后欲避天子位奉母妃歸藩羣臣惶懼太  
后命進王為興獻帝妃為興國后璁更為大禮或問以

進而主事霍韜桂萼給事中熊浹議與總合帝因諭輔臣楊廷和蔣冕毛紀帝后加稱皇廷和等合廷臣爭之未決嘉靖元年禁中火廷和及給事中鄧繼曾朱鳴陽引五行五事為廢禮之證乃輟稱皇加稱本生父興獻帝尊園曰陵黃屋監衛如制設祠署安陸歲時享祀用十二籩豆樂用八佾帝心終未慊三年加稱為本生皇考恭穆獻皇帝興國太后為本生母章聖皇太后建廟奉先殿西曰觀德殿祭如太廟七月諭去本生號九月



詔稱孝宗皇帝考稱獻皇帝曰皇考璵等既驟貴于進者爭以言禮希上意百戶隨全錄事錢子勲言獻皇帝宜遷葬天壽山禮部尚書席書議高皇帝不遷祖陵太宗不遷孝陵蓋其慎也小臣妄議山陵宜罪工部尚書趙璜亦言不可乃止尊陵名曰顯陵明年修獻皇帝實錄建世廟於太廟左六年以觀德殿狹隘改建崇先殿七年命璵等集明倫大典成上加尊謚曰恭睿淵仁寬穆純聖獻皇帝親製顯陵碑封松林山為純德山從

祀方澤次五鎮改安陸州為承天府十七年通州同知  
豐坊請加尊皇考稱宗以配上帝九月加上尊謚  
知天守道洪德淵仁寬穆純聖恭儉敬文獻皇帝廟號  
睿宗祔太廟位次武宗上明堂大享奉主配天罷世廟  
之祭四十四年芝生世廟柱復作玉芝宮配焉穆宗立  
乃罷明堂配享初楊廷和等議封益王次子崇仁王厚  
炫為興王奉獻帝祀不允興國封除獻帝有長子厚熙  
生五日而殤嘉靖四年贈岳王謚曰懷獻皇后蔣氏世

宗母也父數大興人追封玉田伯弘治五年冊為興王妃世宗入承大統即位三日遣使詣安陸奉迎而令廷臣議推尊禮咸謂宜考孝宗而稱興王為皇叔父妃為皇叔母議三上未決會妃將至禮臣上入宮儀由崇文門入東安門皇帝迎於東華門不許再議由正陽門入大明承天端門從王門入宮又不許王門諸王所出入門也敕曰聖母至御太后車服從御道入朝太廟故事后妃無謁廟禮禮臣難之時妃至通州聞考孝宗志曰

安得以吾子為他人子留不進帝涕泣願避位羣臣以  
慈壽太后命改稱興獻后乃入以太后儀謁奉先奉慈  
二殿不廟見元年改稱興國太后三年乃上尊號曰本  
生章聖皇太后是年秋用張璪等言尊為聖母章聖皇  
太后五年獻帝世廟成奉太后入謁七年上尊號曰慈  
仁九年頒太后所製女訓於天下十五年奉太后謁天  
壽山陵命諸臣進賀行殿是年加上尊號曰康靜貞壽  
十七年十二月崩諭禮工二部將改葬獻皇帝於大峪

山以駙馬都尉京山侯崔元為奉迎行禮使兵部尚書  
張瓚為禮儀護行使指揮趙俊為吉凶儀仗官翊國公  
郭勛知聖母山陵事已帝親幸大峪相視令議奉太后  
南詣合葬而禮部尚書嚴嵩等言靈駕北來慈宮南詣  
共一舉耳大峪可朝發夕至顯陵遠在承天恐陛下春  
秋念之臣謂如初議便帝曰成祖豈不思皇祖耶何以  
南孝陵因止崔元等毋行而令趙俊往且啟視幽宮是  
年上尊諡曰慈孝貞順仁敬誠一安天誕聖獻皇后明

年俊歸謂顯陵不吉遂議南巡九卿大臣許讚等諫不聽左都御史王廷相又諫帝曰朕豈空行哉為吾母耳已而侍御呂柟給事中曾烜御史劉賢郎中岳倫等復相繼疏諫不聽三月帝至承天謁顯陵作新宮焉曰待合葬也歸過慶都御史謝少南言慶都有堯母墓佚於祀典請祀之帝曰帝堯父母異陵可知合葬非古即拜少南左春坊左司直兼翰林院檢討定議葬大峪山四月帝謁長陵諭嚴嵩曰大峪不如純德仍命崔元護梓

宮南祔七月合葬顯陵主祔睿宗廟

贊曰興宗睿宗雖未嘗身為天子而尊號徽稱典禮具脩其實有不容泯者史者所以記事也記事必核其名與實曰宗曰帝者當時已定之名名定而實著焉矣爰據元史裕宗睿宗列傳之例別為一卷如右而各以后附焉

明史卷一百十五